

四庫全書

集部

欽定四庫全書

渭南文集卷四十六

宋 陸游 撰

入蜀記

八日蚤由山路至太平興國宮門庭氣象極闊壯正殿
為九天採訪使者像袞冕如帝者舒州瀟山靈仙觀
祀九天司命真君而採訪使者為之佐故南唐名靈
仙曰丹霞府太平曰通玄府崇奉有自來矣至太宗

皇帝時嘗遣中使送泥金絳羅雲鶴帳仍命三年一
易神宗皇帝時又加封應元保運真君及賜塗金殿
額兩壁圖十真人本吳生筆建炎中李成何世清二
盜以廬山為巢宮屋焚蕩無餘先是山中有太一宮
摹吳筆於殿蕪及太平再興復摹取太一本所託非
善工無復彷彿憩於雲無心堂蓋冷翠亭故趾也溪
聲如大風雨至使人毛骨寒慄一宮之最勝處也采訪
殿前有鍾樓高十許丈三層累磚所成不用一木而

欄桷翬飛雖木工之良者不能加也但鍾為塼所掄
蔽聲不甚揚亦是一病觀主胡思齊云此一樓為費
三萬緡鍾重二萬四千餘斤又有經藏亦佳扁曰雲
章瓊室太平規模大緊南昌之玉隆然玉隆不經焚
焚尚有古趣為勝也遂至東林太平興龍寺寺正對
香爐峯峯分一支東行自北而西環合四抱有如城郭
東林在其中相地者謂之倒挂龍格寺門外虎溪本
小澗比年甃以塼但若一溝無復古趣予勸其主僧

法才去塲使少近自然不知能用吾言否食已煑觀
音泉啜茶登華嚴羅漢閣閣與盧舍閣鍾樓鼎峙皆
極天下之壯麗雖閩浙名藍所不能逮遂至上方五
杉閣舍利塲白公草堂上方者自寺後支徑穿松陰
躡石磴而上亦不甚高五杉閣前舊有老杉五本傳
以為晉時物白傳所謂大十尺圍者今又數百年其
老可知矣近歲主僧了然輒伐去殊可惜也塲中作
如來示寂像本宋佛趺跏趺尊者自西域持舍利五

粒來葬於此草堂以白公記考之畧是故處三間兩
注亦如記所云其他如瀑水蓮池亦皆在高風逸韻
尚可想見白公嘗以文集留草堂後屢亡逸真宗皇
帝嘗令崇文院寫校包以斑竹帙送寺建炎中又壞
於兵今獨有姑蘇版本一帙備故事耳草堂之旁又
有女故趾云是王子醇樞密菴基蓋東林為禪苑始
於王公而照覺禪師常總實第一祖總公有塑像嚴
重英特人也宿東林

九日至晉慧遠法師祠堂及神運殿焚香憩官廳堂中
有耶舍尊者劉遺民等十八人像謂之十八賢遠公
之側又有一人執軍持侍立謂之辟蛇童子傳云東
林故多蛇此童子盡拾取投之蘄州神運殿本龍潭
深不可測一夕鬼神塞之且運良材以作此殿皆不
知實否也然神運殿三字唐相裴休書則此說亦久
矣官廳重堂邃廡廚餼備設壁間有張文潛題詩奇
極大連日游歷猶不能徧唐碑亦甚多惟顏魯公題

名最為時所傳又有聰明泉在方丈之西卓錫泉在
遠公祠堂後皆久廢不汲不可食為之太息食已游
西林乾明寺西林在東林之西二林之間有小市曰
雁門市傳者以為遠公雁門人老而懷故鄉遂彷彿
雁門邑里作此市漢作新豐之比也西林本晉江州
刺史陶範捨地建寺紹興十五六年間方為禪居福
小非東林比又絕弊壞主僧仁聰閩人方漸興葺然
流泉泠泠環遠庭際殊有野趣正殿釋迦像著寶冠

他處未見僧云唐塑也殿側有慧永法師祠堂永公
蓋遠公之兄像下一虎偃伏又有一居士立侍不知
何人方丈後有塼墪不甚高制度古朴予登二級而
止東廂有小閣曰待賢蓋往時館客之地今亦頽弊
東西林寺舊額皆牛奇章八分書筆力極渾厚西林
亦有顏魯公題名書家以為二林題名顏書之冠冕
也舊聞廬山天池塼墪初成有僧施經二匝未幾墪
震一角經亦失所在是日因登望以問僧僧云誠然

或謂經乃刺血書故致此異又云今年天池火尺椽
不遺蓋旁堊火所及也晚復取太平宮路還江州小
憩於新亭距州二十五里過董真人煉丹井汲飲味
亦佳董真人者奉也

十日史志道餉谷簾水數器真絕品也甘腴清冷具備
衆美前輩或斥水品以為不可信水品固不必盡當
然谷簾卓然非惠山所及則亦不可誣也水在廬山
景德觀晚別諸人連夕在山中極寒可擁爐比還舟

秋暑殊未艾終日揮扇

十一日解舟吳發幹約待夔州書因小留江口望廬山
自到江州至是凡十日皆晴秋高氣清長空無纖雲
甚宜登覽亦客中可喜事也泊赤沙湖口東北望猶
見廬山老杜潭州道林詩云殿脚插入赤沙湖此湖
當在湖南然岳州華容縣及此皆有赤沙湖蓋江湖
間地名多同猶赤壁也

十二日江中見物有雙角遠望正如小犢出沒水中有

聲晚泊艣臍狀隔江大山中有火兩點若鐙開闔久之問舟人皆不能知或云蛟龍之目或云靈芝丹藥光氣不可得而詳也

十三日至富池昭勇廟以壺酒特豕謁昭毅武惠遺愛靈顯王神神吳大帝時折衝將軍甘興霸也興霸嘗為西陵太守故廟食於此開寶中既平江南增江淮神祠封爵始封襄國公宣和中進爵為王建炎中大盜張遇號一窩蜂擁兵過廟下相率卜琰一琰騰空

中不下一玳躍出戶外羣盜惶恐引去未幾遂敗大將劉光世以聞復詔加封岳飛為宣撫使大葺祠宇江上神祠皆不及也門起大樓曰卷雪有釘洲正對廟故廟雖附大江而可泊舟釘洲者以銳下得名神妃封順祐夫人神二子封紹威紹靈侯神女封柔懿夫人皆有像而後殿復有王與妃像偶坐祭享之盛以夜繼日廟祝歲輸官錢千二百緡則神之靈可知也舟人云若精虔致禱則神能分風以應往來之舟

廡下有闕雲長像雲長不應祀於興霸之廟者豈各
所事神靈共食皆可以無愧邪徹奠自祠後步至旌
教寺寺為酒務及酒官廨像設歛置一屋盡逐去僧
輩亦事之已甚者富池蓋隸興國軍

十四日曉雨過一小石山自頂直削去半與餘姚江濱
之蜀山絕相類拋大江遇一木棧廣十餘丈長五十
餘丈上有三四十家妻子雞犬白碓皆具中為阡陌
相往來亦有神祠素所未覩也舟人云此尚其小者

耳大者於棧上鋪土作蔬圃或作酒肆皆不復能入
夾但行大江而已是日逆風挽船自平旦至日昃纔
行十五六里泊劉官磯旁蘄州界也兒輩登岸歸云
得小徑至山後有陂湖渺然蓮芰甚富沿湖多木芙蓉
蘊數家夕陽中蘆藩茅舍宛有幽致而寂然無人聲
有大梨欲買之不可得湖中小艇采菱呼之亦不應
更欲窮之會見道旁設機疑有虎狼遂不敢往劉官
磯者傳云漢昭烈人吳嘗樣舟於此晚觀大黿浮沉

水中

十五日微陰西風益勁挽船尤難自富池以西沿江之
南皆大山起伏如濤頭山麓時有居民往往作棚持
弓矢伏其上以伺虎過龍眼磯江中拳石耳磯旁山
上有龍祠晡後得便風次蘄口鎮居民繁錯蜀舟泊
岸下甚衆監稅秉義郎高世棟來舊在京口識之言
此鎮歲課十五萬緡雁翅歲課二十六萬緡夜與諸
子登岸臨大江觀月江面遠與天接月影入水蕩搖

不定正如金虬動心駭目之觀也是日買熟藥於蕪口市藥貼中皆有煎煮所須如薄荷烏梅之類此等皆客中不可倉卒求者藥肆用心如此亦可嘉也

十六日過新野夾有石瀨茂林始聞秋鶯沙際水牛至多往往數十為羣吳中所無也地屬興國軍大治縣當是土產所宜爾晚過道士磯石壁數百尺色正青了無竅穴而竹樹迸根交絡其上蒼翠可愛自過小孤臨江峰嶂無出其右磯一名西塞山即玄真子漁

父辭所謂西塞山前白鷺飛者李太白送弟之江東
云西塞當中路南風欲進船必在荆楚作故有中路
之句張文潛云危機插江生石色擘青玉殆為此山
寫真又云已逢娖媚散花峽不泊難危道士磯蓋江
行惟馬當及西塞最為湍險難上拋江泊散花洲洲
與西塞相直前一夕月猶未極圓蓋望正在是夕空
江萬頃月如紫金盤自水中涌出平生無此中秋也
十七日過回風磯無大山蓋江濱石磧耳然水急浪湧

舟過甚難過蘭溪東坡先生所謂山下蘭芽短浸谿
者買鹿肉供膳晚泊巴河口距黃州二十里一市聚
也有馬祈寺吳大帝刑馬壇傳云吳攻壽春刑白馬
祭江神於此自蘭谿而西江面尤廣山阜平遠兩日
皆逆風舟人以食盡欲來巴河糴米極力牽挽日皆
行八九十里蘇黃門謫高安東坡先生送至巴河即
此地也張文潛亦有巴河道中詩云東南地缺天連
水春夏風高浪捲山

十八日食時方行晡時至黃州州最僻陋少事杜牧之
所謂平生睡足處雲夢澤南州然自牧之王元之出
守又東坡先生張文潛謫居遂為名邦泊臨臯亭東
坡先生所嘗寓與秦少游書所謂門外數步即大江
是也煙波渺然氣象疎豁見知州右朝奉郎直祕閣
楊由義通判右奉議郎陳紹復州治陋甚廳事僅可
容數客倅居差勝晚移舟竹園步蓋臨臯多風濤不
可夜泊也黃州與樊口正相對東坡所謂武昌樊口

幽絕處也漢昭烈用吳魯子敬策自當陽進住鄂縣之樊口即此地也

十九日登游東坡自州門而東岡壘高下至東坡則地勢平曠開豁東起一壘頗高有屋三間一龜頭曰居士亭亭下面南一堂頗雄四壁皆畫雪堂中有蘇公像烏帽紫裘橫按筇杖是為雪堂堂東大柳傳以為公手植正南有橋榜曰小橋以莫忘小橋流水之句得名其下初無渠澗遇雨則有涓流耳舊止片石布

其上近輒增廣為木橋覆以一屋頗敗人意東一井
曰暗井取蘇公詩中走報暗井出之句泉寒熨齒但
不甚甘又有四望亭正與雪堂相直在高阜上覽觀
江山為一郡之最亭名見蘇公及張文潛集中坡西
竹林古氏故物號南坡今已殘伐無幾地亦不在古
氏矣出城五里至安國寺亦蘇公所嘗寓兵火之餘
無復遺迹惟遶寺茂林啼鳥似猶有當時氣象也郡
集於棲霞樓本太守閻丘孝終公顯所作蘇公樂府

云小舟橫截春江臥看翠壁紅樓起正謂此樓也下
臨大江煙微微茫遠山數點亦佳處也樓頗華潔先
是郡有慶瑞堂謂一故相所生之地後毀以新此樓
酒味殊惡蘇公齋湯蜜汁之戲不虛發郡人何斯舉
詩亦云終年飲惡酒誰敢憎督郵然文潛乃極稱黃
州酒以為自京師之外無過者故其詩云我初謫官
時帝問司酒神曰此好飲徒聊給酒養真去國一千
里齊安酒最醇失火而得雨仰戴天公仁豈文潛謫

黃時適有佳匠乎循小徑繚州宅之後至竹樓規模
甚陋不知當王元之時亦止此邪樓下稍東即赤壁
磯亦茆岡爾畧無草木故韓子蒼待制詩云豈有危
巢與栖鶻亦無陳迹但飛鷗此磯圖經及傳者皆以
為周公瑾敗曹操之地然江上多此名不可考質李
太白赤壁歌云烈火張天照雲海周瑜於此敗曹公
不指言在黃州蘇公尤疑之賦云此非曹孟德之困
於周郎者乎樂府云故壘西邊人道是當日周郎赤

壁蓋一字不輕下如此至韓子蒼云此地能令阿瞞
走則真指為公瑾之赤壁矣又黃人實謂赤壁曰赤
鼻尤可疑也晚復移舟菜園步又遠竹園三四里蓋
黃州臨大江了無港澳可泊或云舊有澳郡官厭過
客故塞之

二十日曉離黃州江平無風挽船正自赤壁磯下過多
奇石五色錯雜粲然可愛東坡先生怪石供是也挽
行十四五里江面始稍狹隔江岡阜延袤竹樹蔥蘢

漁家相映幽邃可愛復出大江過三江口極望無際
泊威磯港

二十一日過雙柳夾回望江上遠山重複深秀自離黃
雖行夾中亦皆曠遠地形漸高多種菽粟蕎麥之屬
晚泊楊羅洲大隄高柳居民稠衆魚賤如土百錢可
飽二十口又皆巨魚欲覓小魚飼猫不可得

二十二日平旦微雨過青山磯多碎石及淺灘晚泊白
楊夾口距鄂州三十里陸行止十餘里居民及泊舟

甚多然大抵皆軍人也

二十三日便風掛帆自十四日至是始得風食時至鄂
州泊稅務亭賈船客舫不可勝計銜尾不絕者數里
自京口以西皆不及李太白贈江夏韋太守詩云萬
舸此中來連帆過揚州蓋此郡自唐為衝要之地夔
州逐兵來參見知州右朝奉郎張郊之彥轉運判官
右朝奉大夫謝師稷市邑雄富列肆繁錯城外南市
亦數里雖錢塘建康不能過隱然一大都會也吳所

都武昌乃今武昌縣此州在吳名夏口亦要害故周
公瑾求以精兵進住夏口而晉武帝亦詔王濬唐彬
既定巴丘與胡奮王戎共平夏口武昌順流長驚也
自江州至此七百里泝流雖日得便風亦須三四日
韓文公云益城去鄂渚風便一日耳過矣蓋退之未
嘗行此路也

二十四日蚤謝漕招食於漕園光華堂依山亭館十餘
不甚葺晚羣集於奇章堂以唐牛思黯嘗為武昌節

度使也

二十五日觀大軍教習水戰大艦七百艘皆長二三十丈上設城壁樓櫓旗幟精明金鼓鞺鞳破巨浪往來捷如飛翔觀者數萬人實天下之壯觀也

二十六日與統紆同游頭陀寺寺在州城之東隅石城山山繚繞如伏蛇自西亘東因其上為城缺壞僅存州治及漕司皆依此山寺毀於兵火汴僧舜廣住持三十年興葺畧備自方丈西北躡支徑至絕頂舊有

奇章亭今已廢四顧江山井邑靡有遺者李太白江
夏贈韋南陵詩云頭陀雲外多僧氣正謂此寺也黃
魯直亦云頭陀全盛時宮殿梯空級藏殿後有南齊
王簡棲碑唐開元六年建蘇州刺史張庭圭溫王書
韓熙載撰碑陰徐鉉題額最後云唐歲在己巳武昌
軍節度觀察留後知軍州事楊守忠重立前鄂州唐
年縣主簿祕書省正字韓夔書碑陰云乃命猶子夔
正其舊本而刊寫之以是知夔為熙載兄弟之子也

碑字前後一手又作溫字不全蓋南唐尊徐溫為義祖而避其名則此碑蓋變重書也碑陰又云皇上鼎新文物教被華夷如來妙旨悉已徧窮百代文章罔不備舉故是寺之碑不言而興按此碑立於己巳歲當皇朝之開寶二年南唐危蹙日甚距其亡六年爾熙載大臣不以覆亡為懼方且言其主鼎新文物教被華夷固已可怪又以窮佛旨舉遺文及興是碑為盛誇誕妄謬真可為後世發笑然熙載死李主猶恨

不及相之君臣之感如此雖欲久存得乎唐制節度使不在鎮而以副大使或留後居任則云知節度事此云知軍州事蓋漸變也唐年縣本故唐時名梁改曰臨夏後唐復晉又改臨江然歷五代鄂州未嘗屬中原皆遙改耳故此碑開寶中建而猶曰唐年也至江南平始改崇陽云簡棲為此碑駢儷卑幼初無過人世徒以載於文選故貴之耳自漢魏之間駸駸為此體極於齊梁而唐尤貴之天下一律至韓吏部柳

柳州大變文格學者翕然慕從然駢儷之作終亦不
衰故熙載錯號江左辭宗而拳拳於簡棲之碑如此
本朝楊劉之文擅天下傳夷狄亦駢儷也及歐陽公
起然後掃蕩無餘後進之士雖有工拙要皆近古如
此碑者今人讀不能終篇已坐睡矣而況効之乎則
歐陽氏之功可謂大矣若魯直云唯有簡棲碑文章
巋然立蓋戲也

渭南文集卷四十六

欽定四庫全書

渭南文集卷四十七

宋 陸游 撰

入蜀記

二十七日羣集於南樓在儀門之南石城上一曰黃鶴
山制度閎偉登望尤勝鄂州樓觀為多而此獨得江
山之要會山谷所謂江東湖北行畫圖鄂州南樓天
下無是也下闕南湖荷葉彌望中為橋曰廣平其上

皆列肆兩旁有水閣極佳但以賣酒不可往山谷云
凭欄十里芰荷香謂南湖也是日蚤微雨晚晴

二十八日同章冠之秀才甫登石鏡亭訪黃鶴樓故址
石鏡亭者石城山一隅正枕大江其西與漢陽相對
止隔一水人物草木可數唐沔州治漢陽縣故李太
白沔州泛城南郎官湖詩序云白遷於夜郎遇故人
尚書郎張謂出使夏口沔州牧杜公漢陽令王公觴
於江城之南湖其後沔州廢漢陽以縣隸鄂州周世

宗平淮南得其地復以為軍太白詩云誰道此水廣
狹如一疋練江夏黃鶴樓青山漢陽縣大語猶可聞
故人難可見形容最妙黃魯直宵征江夏縣睡起漢
陽城亦此意老杜有公安送李晉肅入蜀余下沔鄂
及登舟將適漢陽詩而卒於耒水可恨也漢陽負山
帶江其南小山有僧寺者大別山也又有小別謂之
二別云黃鶴樓舊傳費禕飛升於此後忽稟黃鶴來
歸故以名樓號為天下絕景崔灝詩最傳而太白奇

句得於此者尤多今樓已廢故址亦不復存問耆吏云在石鏡亭南樓之間正對鸚鵡洲猶可想見其地樓榜李監篆石刻獨存太白登此樓送孟浩然詩云孤帆遠映碧山盡惟見長江天際流蓋帆檣映遠山尤可觀非江行久不能知也復與冠之出漢陽門游仙洞止是石壁數尺皆直裂無洞穴之狀舊傳有仙人隱其中嘗啓洞出游老兵遇之得黃金數瓶後化為石東坡先生有詩紀其事初不云所遇何人且太

白固已云頗聞列仙人於此學飛術一朝向蓬海千
載空石室今鄂人謂之呂公洞蓋流俗附會也有道
人澶州人結廬洞側設呂公像其中洞少南即石鏡
山麓麤頑石也色黃赤皴駁了不能鑑物可謂浪得
名者由江濱堤上還船民居市肆數里不絕其間復
有巷陌往來憧憧如織蓋四方商賈所集而蜀人為
多

二十九日蚤有廣漢僧世全左縣僧了證來附從人舟

日映移舟江口回望堤上樓閣重複燈火歌呼夜分
乃已招醫趙隨為靈照視脈

三十日黎明離鄂州便風掛颿沿鸚鵡洲南行洲上有
茂林神祠遠望如小山洲蓋禰正平被殺處故太白
詩云至今芳洲上蘭蕙不敢生梁王僧辨擊郢陵王
綸軍至鸚鵡洲即此地也自此以南為漢水禹貢所
謂嶓冢導漾東流為漢者水色澄澈可鑑太白云楚
水清若空蓋言此也過謝家磯金泱磯不甚高而石

石皆橫裂如累層甃得縮項鰱魚重十斤淤中有聚
落如小縣出鱖魚居民率以賣鮓為業晚泊通濟口
自此入沌沌讀如篆字書云水名在江夏過九月則
沌涸不可行必由巴陵至荊渚

九月一日始入沌實江中小夾也過新潭有龍祠甚華
潔自是遂無復居人兩岸皆葭葦彌望謂之百里荒
又無挽路舟人以小舟引百丈入夜財行四十五里泊葦
葦中平時行舟多於此遇盜通濟巡檢持兵來警邏

不寐達旦

二日東岸葦稍薄缺時見大江渺瀰蓋巴陵路也晡時
次下郡始有二十餘家皆業漁釣蘆藩茅屋宛有幽
致魚尤不論錢自此始復有挽路登舟背望竟陵遠
山泊白白有莊居數家門外皆古柳侵雲

三日自入沌食無菜是日始得菰及蘆服然不肯斲根
皆刈葉而已過八疊汊口皆有民居晚泊歸子保亦
有十餘家多桑柘榆柳

四日平旦始解舟舟人云自此陂澤深阻虎狼出沒未
明而行則挽卒多為所害是日蚤見舟人焚香祈神
云告紅頭須小使頭長年三老莫令錯呼錯喚問何
謂長年三老云梢工是也長讀如長幼之長乃知老
杜長年三老長歌裏白晝攤錢高浪中之語蓋如此
因問何謂攤錢云博也按梁冀能意錢之戲注云即
攤錢也則攤錢之為博亦信矣過網步有二十餘家
在夕陽高柳中短籬晒罾小艇往來正如畫圖所見

沱中之最佳處也泊畢家池地勢爽塏居民頗衆有
一、二家雖茆荻結廬而窓戶整潔藩籬堅壯舍傍有
果園甚盛蓋亦一聚之雄也與諸子及二僧步登岸
游廣福永固寺闐然無一人東偏白雲軒前橙方結
實雖小而極香相與烹茶破橙抵暮乃還舟中畢家
池蓋屬復州玉沙縣滄浪鄉云

五日泊紫湄

六日過東場並水皆茂竹高林隄淨如掃雞犬聞暇見

鴨浮没人往來林樾間亦有臨渡喚船者使人恍然
如造異境舟人云皆村豪園廬也泊雞鳴

七日泊湛江

八日蚤次江陵之建寧鎮蓋沌口也晉王澄棄荊州別
駕郭舒不肯從澄東下乃留沌沌口陳侯安都討王
琳至沌口皆此地也阻風大雨浮水中無數凡行沌
中七日自是泛江入石首縣界夜觀隔江燒蘆場煙
焰亘天如火城光照舟中皆赤

九日蚤謁后土祠道旁民屋苦茆皆厚尺餘整潔無一枝亂挂帆拋江行三十里泊埕子磯江濱大山也自離鄂州至是始見山買羊置酒蓋村步以重九故居一羊諸舟買之俄頃而盡求菊花於江上人家得數枝芬馥可愛為之頽然徑醉夜雨極寒始覆絮衾十日阻風雨遣小舟橫絕江面至對岸買肉食得大魚之半又得一鳥壯雞不忍殺畜於舟中俄有村翁持茭萌一束來餉不肯受直遣人先之變晚晴開船窓

觀月

十一日舟行望西南一角水與天接舟人云是為潛軍
港古嘗潛軍伺敵於此遙見港中有兩點正黑疑其
遠樹則下不屬地久之漸近可辨蓋二千五百斛大
舟也又有水禽雙浮江中色白類鵠而大楚人謂之
天鵝飛鵝絕高有弋得者味甚美或曰即鵠也泊三
江口水淺舟行甚難自此遂不復有山太白詩山隨
平野盡江入太荒流蓋荆門所作也

十二日過石首縣不入石首自唐始為縣在龍蓋山之麓下臨漢水亦形勝之地杜子美有送石首薛明府詩即此邑也泊藕池

十三日泊柳子夜過全證二僧舟中聽誦梵語般若心經此經惟蜀僧能誦

十四日次公安古所謂油口也漢昭烈駐軍始更今名規模氣象甚壯兵火之後民居多茆竹然茆屋尤精緻可愛井邑亦頗繁富米斗六七十錢知縣右儒林

郎周謙孫來湖州人遊二聖報恩光孝禪寺二聖謂
青葉髻如來婁至德如來也皆示鬼神力士之形高
二丈餘陰威凜然可畏正殿中為釋迦右為青葉髻
號大聖左為婁至德號二聖三像皆南面予按藏經
駒字函婆羅浮殊童子成道為青葉髻如來青葉髻
如來再出世為樓至如來則二如來本一身耳有碑
言邑人一夕同夢二神人言我青葉髻婁至德如來
也有二巨木在江干我所運者俟鄣行者來令刻為

我像已而果有人自稱鄩行者又善肖像邑人欣然
請之像成人皆謂酷類所夢然碑無年月不知何代
也長老祖珠南平軍人寺後有廢城髣髴尚存圖經
謂之呂蒙城然老杜乃曰地曠呂蒙營江深劉備城
蓋玄德子明皆屯於此也老杜曉發公安詩注云數
月憩息此縣按公移居公安詩云水煙通徑草秋露
接園葵而留別公安太易沙門詩云沙村白雪仍含
凍江縣紅梅已放春則是以秋至此縣莫冬始去其

曰數月憩息蓋為此也泊弭節亭馴鷗低飛往來竟
日不去

十五日周令說縣本在近北枕漢水沙虛岸摧漸徙而
南今江流乃昔市邑也又云縣有五鄉然共不及二
千戶地曠民寡如此民耕尤苦隄防數壞歲歲增築
不止晚攜家再游二聖寺衆寮有維摩刻木像甚佳
云沙市工人所為也方丈西有竹軒頗佳珠老說五
祖法演禪師初住四面山孑然獨處凡二年始有一

道士來問道乃請作知事又三年僧寶良來與道士朝夕叅叩皆得法於是演公之道寔為人知而四方學者始稍有至者雖其後門人之盛稱天下然終身不過數十衆珠聞此於其師萬菴顏禪師荊州絕無禪林惟二聖而已然蜀僧出關必走江浙回者又已自謂有得不復參叩故語云下江者疾走如煙上江者鼻孔撩天徒勞他二佛打供了不見一僧坐禪

十六日過白湖渺然無涯拋江至升子鋪有天鵝數百

翔泳水際日入泊沙市自公安至此六十里自此至
荊南陸行十里舟不復進矣老杜詩云買薪猶白帝
鳴艣已沙頭劉夢得云沙頭檣干上始見春江濶皆
謂此也

十七日日入後遷行李過嘉州趙青船蓋入峽船也沙
市堤上居者大抵皆蜀人不然則與蜀人為婚姻者
也

十八日見知府資政殿學士劉恭父珙通判右奉議郎

權嗣衍左宣教郎陳孺荆南圖經以為楚之郢都梁
元帝亦嘗都焉唐為江陵府荆南節度今因之然牧
守署銜但云知荆南軍府與永興河陽正同初無意
義但沿舊而已

十九日羣集於新橋馬監監在西門外四十里自出城
即黃茅彌望每十餘里有村疇數家而已道遇數十
騎縱獵獲狐兔皆繫鞍上割鮮藉草而飲云襄陽軍
人也是日極寒如窮冬土人云此月初已嘗有雪

二十日倒檣竿立艣牀蓋上峽惟用艣及百丈不復張帆矣百丈以巨竹四破為之大如人臂予所乘千六百斛舟凡用艣六枝百丈兩車

二十一日劉帥丁內艱分迂兵之半負肩輿自山路先歸夔州是日重霧四塞

二十二日五鼓赴能仁院建會慶節道場中夜後舟人祀峽神屠一豨

二十三日奠劉帥母安定郡太夫人卓氏劉帥受吊禮

與吳人同

二十四日見左朝奉郎湖北安撫司主管機宜文字牛
達可右奉議郎安撫司幹辦公事湯衡右朝奉郎安
撫同幹辦公事趙蘊

二十五日右文林郎知歸州興山縣高初來

二十六日修船始畢骨肉入新船祭江濱廟用壺酒特
豕廟在沙市之東三四里神曰昭靈孚應威惠廣源
王盖四瀆之一最為典祀之正者然兩廡淫祠尤多

蓋荆楚舊俗也司法右軍右迪功郎王師點錄其叔
祖君儀待制訟卦講議來君儀嚴州人師事先大父
精於易然遺書不傳講義止存一篇而已然亦其少
作也

二十七日解舟擊鼓鳴觴舟人皆大噪擁堤觀者如堵
牆泊新河口距沙市三四里蓋蜀人修船處

二十八日泊方城有嘉州人王百一者初應募為船之
招頭招頭蓋三老之長顧直差厚每祭神得胙肉倍

衆人既而船戶趙清改用所善程小八為招頭百一
失職怏怏又不決去遂發狂赴水予急遣人拯之流
一里餘三沒三踊僅得出一抬頭得喪能使人至死
況大於此乎

二十九日阻風

十月一日過瓜洲壩倉頭百里洲泊沱澨皆聚落竹樹
鬱然民居相望亦有村夫子聚徒教授羣童見船過
皆挾書出觀亦有誦書不輟者沱江別名詩江有沱

禹貢岷山導江東別為沱是也澗則爾雅所謂春秋
夏有水冬無水曰澗也

二日泊桂林灣全證二僧陸行來云沿路居民大抵多
四方人土著財十一也舟人殺猪十餘口祭神謂之
開頭

三日舟人分昨行差晚與兒輩登隄觀蜀江乃知李太
白荆門望蜀江詩江色綠且明為善狀物也自離壩
子磯至是始望見巴山山在松滋縣泊灌子口蓋松

滋枝江兩邑之間松滋晉縣自此入蜀江枝江唐縣
古羅國也江陵九十九洲在焉晉柳約之羅述甄季
之聞桓玄死自白帝至枝江即此地也歐陽文忠公
有枝江山行五言二十四韻盖文忠赴夷陵時自此
陸行至峽州故其望州坡詩云崎嶇幾日山行倦却
喜坡頭見峽州灌子口一名松滋渡劉賓客有詩云
巴人淚應猿聲落蜀客船從鳥道回

四日過楊木塞盖松滋有四寨曰楊木車羊高平稅家

云泊龍灣

五日過白羊市蓋峽州宜都縣境上宜都唐縣也謁張
文忠公天覺墓殘伐墓木橫道幾不可行天覺之子
直龍圖閣茂已卒二孫一有官病狂易一白丁也初
作墓江濱已而不果葬改葬山間今墓是也而舊墓
亦不復毀啓隧道出入中可容數十人坐有道人結
屋其旁守之道人出一石刻草書云莫將外物尋奇
寶須問真師決永鉛寄八瓊張子高鍾離權始自王

屋游都下弟子浮玉山人來乞此字今又將西還丹
元子再請書卷之末紹聖元年仲冬望日權即世所
謂鍾離先生子高即天覺丹元子即東坡先生與之
醕倡者後有魏泰道輔跋云天覺修黃籙醮法成浮
玉山人謂之曰上天錄公之功為須彌山八瓊洞主
宜刻印謝帝而佩之天覺不以為信故浮玉又出鍾
離公書為證後丹元子又為天覺求書卷末又有徐
注者跋云天覺舟過真州方出謁有布衣幅巾者徑

入舟中索筆大書閒人呂洞賓來謁張天覺十字擲
筆即去而天覺即歸墨猶未乾注真人人云親見之
墳前碑樓壁間有詩一篇云秋風十驛望台星想見
冰壺照坐清霖雨已回公旦駕挽鬚聊聽野王箏三
朝元老心方壯四海蒼生耳已傾白髮故人來一別
却歸林下看昇平蓋魏道輔贈天覺詩後人所題者
唐立夫舍人亦有一詩末句云無碑堪墮淚著句與
招魂宜都知縣右文林郎呂大辨來泊赤崖



渭南文集卷四十七

欽定四庫全書

集部

渭南文集卷

四十八至
五十

詳校官庶吉士臣陳若霖

主事臣呂雲棟覆勘

總校官知縣臣繆珙

校對官典簿臣郭祚熾

謄錄監生臣浦炯

欽定四庫全書

渭南文集卷四十八

宋 陸游 撰

入蜀記

六日過荊門十二碛皆高崖絕壁嶄巖突兀則峽中之
險可知矣過碛望五龍及雞籠山崖戕正如夏雲之
奇峯荊門者當以險固得名碛上有石穴正方高可
通人俗謂之荊門則妄也晚至峽州泊至喜亭下峽

州在唐為硤州後改峽而印文則為陝州元豐中郎

官何洵直建言陝與陝相亂請改鑄印文從山事下

少府監而監丞歐陽發言湖北之陝州從阜從夾

夾從

兩入陝西之陝州從阜從夾

夾從

偏旁不同本不相亂

恐四方謂少府監官皆不識字當時朝士之議皆是
發而卒從洵直言改鑄云至喜亭記歐陽公撰黃魯

直書

七日見知州右朝奉大夫葉安行字履道以小舟遊西

山甘泉寺竹橋石磴甚有幽趣有靜練洗心二亭下
臨江山頗疎豁法堂之右小徑數十步至一泉曰孝
婦泉謂姜詩妻龐氏也泉上亦有龐氏祠然歐陽文
忠公不以為信故其詩曰叢祠已廢姜祠在事迹難
尋楚語訛又此篇首章云江上孤峯蔽綠蘿初讀之
但謂孤峯蒙藤蘿耳及至此乃知山下為綠蘿谿也
又至漢景帝廟及東山寺景帝不知何以有廟於此
歐陽公為令時有祈雨文在集中東山寺亦見歐陽

公詩距望京門五里寺外一亭臨小池有山如屏環之頗佳亭前冬青及柏皆百餘年物遂至夷陵縣令見縣左從政郎胡振廳事東至喜堂郡守朱虞部為歐陽公所築者已焚壞柱礎尚存規模頗雄深又東則祠堂亦簡陋肖像殊不類可歎聽事前一井相傳為歐陽公所浚水極甘寒為一郡之冠井旁一枌合抱亦傳為公手植晚郡集於楚塞樓遍歷爾雅臺錦障亭亭前海棠二本亦百年物爾雅臺者圖經以為

郭景純註爾雅於此又有絳雪亭取歐陽公千葉紅梨詩而紅梨已不存矣

八日五鼓盡解船過下牢關夾江千峰萬嶂有競起者有獨拔者有崩欲壓者有危欲墜者有橫裂者有直圻者有凸者有窪者有罅者奇怪不可盡狀初冬草木皆青蒼不彫西望重山如闕江出其間則所謂下牢谿也歐陽文忠公有下牢津詩云入峽山漸曲轉灘山更多即此也繫船與諸子及證師登三游洞躡

石磴二里其險處不可著腳洞大如三間屋有一穴
通人過然陰黑峻險尤可畏繚山腹偃僂有巖下至
洞前差可行然下臨溪潭石壁十餘丈水聲恐人又
一穴後有壁可居鍾乳歲久垂地若柱正當穴門上
有刻云黃大臨第庭堅同辛紘子大方紹聖二年三
月辛亥來遊旁石壁上刻云景祐四年七月十日夷
陵歐陽永叔下缺一字又云判官丁下又缺數字丁
者竇臣也字元珍今丁字下二字亦髣髴可見殊不

類元珍字又永叔但曰夷陵不稱令洞外溪上又有
一崩石偃仆刻云黃庭堅弟叔向子相姪徹同道人
唐履來游觀辛亥舊題如夢中事也建中靖國元年
三月庚寅按魯直初謫黔南以紹聖二年過此歲在
乙亥今云辛亥者誤也泊石牌峽石穴中有石如老
翁持魚竿狀略無少異

九日微雪過扇子峽重山相掩政如屏風扇疑以此得
名登蝦蟆碯水品所載第四泉是也蝦蟆在山麓臨

江頭鼻吻領絕類而背脊鮑處尤逼真造物之巧有
如此者自背上深入得一洞穴石色綠潤泉泠泠有
聲自洞出垂蝦蟆口鼻問成水簾入江是日極寒巖
嶺有積雪而洞中溫然如春碕洞相對稍西有一峯
孤起侵雲名天柱峰自此山勢稍平然江岸皆大石
堆積彌望正如濬渠積土狀晚次黃牛廟山復高峻
村人來賣茶菜者甚衆其中有婦人皆以青斑布帕
首然頗白暫語音亦頗正茶則皆如柴枝草葉苦不

可入口廟靈感神封嘉應保安侯皆紹興以來制書
也其下即無義灘亂石塞中流望之可畏然舟過乃
不甚覺蓋操舟之妙也傳云神佐夏禹治水有功故
食於此門左右各一石馬頗卑小以小屋覆之其右
馬無左耳蓋歐陽公所見也廟後鼓木似冬青而非
莫能名者落葉有黑文類符篆葉葉不同兒輩亦求
得數葉歐詩刻石廟中又有張文忠一贊其詞曰壯
哉黃牛有大神力輦聚巨石百千萬億劒戟齒牙礪

碗江側壅激波濤險不可測威脅舟人駭怖失色剋
羊醞酒千載廟食張公之意似謂神聚石壅流以脅
人求祭饗使神之心果如此豈能巍然廟食千載
乎蓋過論也夜舟人來告請無擊更鼓云廟後山中
多虎聞鼓則出

十日早以特豕壺酒祭靈感廟遂行過鹿角虎頭史君
諸灘水縮已三之二然湍險猶可畏泊城下歸州秣
歸縣界也與兒曹步沙上回望正見黃牛峽廟後山

如屏風疊巖我插天第四疊上有若牛狀其色赤黃
前有一人如著帽立者昨日及今早雲冒山頂至是
始見之因至白沙市慈濟院見主僧志堅問地名城
下之由云院後有楚故城今尚在因相與訪之城在
一岡阜上甚小南北有門前臨江水對黃牛峽城西
北一山蜿蜒回抱山上有伍子胥廟大抵自荆以西
子胥廟至多城下多巧石如靈壁湖口之類

十一日過達洞灘灘惡與骨肉皆瘞輜陸行過灘灘際

多奇石五色粲然可愛亦或有文成物象及符書者
猶見黃牛峽廟後山太白詩云三朝上黃牛三莫行
太遲三朝又三莫不覺鬢成絲歐陽公云朝朝莫莫
見黃牛徒使行人過此愁山高更遠望猶見不是黃
牛滯客舟蓋諺謂朝見黃牛暮見黃牛一朝一莫黃
牛如故故二公皆及之歐陽公自荆渚赴夷陵而有
下牢三游及蝦蟆碚黃牛廟詩者蓋在官時來游也
故憶夷陵山詩云憶嘗祇吏役鉅細悉經觀其後又

云荒煙下牢戍百仞塞溪漱蝦蟆噴水簾甘液勝飲
酎亦嘗到黃牛泊舟聽猿狖也晚泊馬肝峽口兩山
對立修聳摩天略如廬山江岸多石百丈縈絆極難
過夜小雨

十二日早過東濡灘入馬肝峽石壁高絕處有石下垂
如肝故以名峽其傍又有獅子巖巖中有一小石蹲
踞張頤碧草被之正如一青獅子微泉泠泠自巖中
出舟行急不能取嘗當亦佳泉也溪上又有一峰孤

起秀麗略如小孤山晚抵新灘登岸宿新安驛夜雪
十三日舟上新灘由南岸上及十七八船底為石所損
急遣人往拯之僅不至沈然銳石穿船底牢不可動
蓋舟人載陶器多所致新灘兩岸南曰官漕平北曰聲

龍門龍門水尤湍急多暗石官漕差可行然亦多銳
石故為峽中最險處非輕舟無一物不可上下舟人
冒利以至此可為戒云遊江濱北廟廟正臨龍門其
下石罅中有溫泉淺而不涸一村賴之婦人汲水皆

背負一全木盎長二尺下有三足至泉旁以杓挹水
及八分即倒坐旁石東盎背上而去大抵峽中負物
率著背又多婦人不獨水也有婦人負酒賣亦如負
水狀呼買之長跪以獻未嫁者率為同心髻高二尺
插銀釵至六隻後插大象牙梳如手大

十四日留驛中晚以小舟渡江南登山至江瀆南廟新
修未畢有一碑前進士曾華旦撰言因山崩石壅成
此澗害舟不可計於是著令自十月至二月禁行舟

知歸州尚書都官員外郎趙誠聞於朝疏鑿之用工八十日而灘害始去皇祐三年也蓋江絕於天聖中至是而復通然灘害至今未能悉去若蔡十二月正月水落石盡出時亦可併力盡鑿去銳石然灘上居民皆利於敗舟賤賣板木及滯畱買賣必沮沮此役不則賂石工以為石不可去須斷以必行乃可成又舟之所以敗皆失於重載當以大字刻石置驛前則過者必自懲創二者皆不可不講當以告當路者

十五日舟人盡出所載始能挽舟過灘然須修治遂易
舟離新灘過白狗峽泊舟興山口肩輿遊玉虛洞去
江岸百里許隔一溪所謂香溪也源出昭君村水味
美錄於水品色碧如黛呼小舟以渡過溪又里餘洞
門小纔袤丈既入則極大可容數百人宏敞壯麗如
入大宮殿中有石成幢蓋旛旗芝草竹笋仙人龍虎
鳥獸之屬千狀萬態莫不逼真其絕異者東石正圓
如日西石半規如月子平生所見巖竇無能及者有

熙寧中謝師厚岑巖起題名又有陳堯咨所作記叙此洞本末云唐天寶中獵者始得之比歸已夜風急不可秉燭炬然月明如晝兒曹與全師皆杖策相從殊不覺崖谷之險也

十六日到歸州見知州右奉議郎賈選子公道判左朝奉郎陳端彥民瞻館於報恩先孝寺距城一里許蕭然無僧歸之為州纔三四百家負卧牛山臨江州前即人鮮壘城中無尺寸平土灘聲常如暴風雨至隔

江有楚王城亦山谷間然地比歸州差平或云楚始
封於此山海經夏啓封孟除於丹陽城郭璞註云在
秭歸縣南疑即此也然史記成王封熊繹於丹陽裴
駟乃云在枝江未詳孰是

十七日羣集於望洋堂玩芳亭亦皆沙石犖确之地賈
守云州倉歲收秋夏二料麥粟秔米共五千餘石僅
比吳中一下戶耳

十八日初得艤船尾小然底濶而輕於上灘為便

十九日羣集於歸鄉堂欲以是晚行不果訪宋玉宅在秭歸縣之東今為酒家舊有石刻宋玉宅三字近以郡人避太守家諱去之或遂由此失傳可惜也

二十日早離歸州出巫峰門過天慶觀少留觀唐天寶元年碑載明皇夢老子事已東太守劉瑫所立字畫頗清逸碑側題當時郡官吏胥姓名字亦佳又有周顯德中荆南判官孫光憲為知歸州高從讓所立碑從讓益南平王家子弟光憲亦知名國史有事迹蓋

五代時歸峽皆隸荆渚也殿前有相數百年物觀下
即吒灘亂石無數飯於靈泉寺遂登舟過棠灘亦名
灘也水落舟輕俄頃遂過

二十一日舟中望石門關僅通一人行天下至險也晚
泊巴東縣江山雄麗大勝秭歸但井邑極於蕭條邑
中纔百餘戶自令廨而下皆茅茨了無片瓦權縣事
妙歸尉右廸功郎王康年尉兼主簿右廸功郎杜德
先來皆蜀人也謁冠萊公祠堂登秋風亭下臨江山

是日重陰微雪天氣颼飄復觀亭名使人悵然始有
流落天涯之歎遂登雙柏堂白雲亭堂下舊有萊公
所植柏今已槁死然南山重複秀麗可愛白雲亭則
天下幽竒絕境羣山環擁層出間見古木森然往往
二三百年物欄外雙瀑瀉石澗中跳珠濺玉冷入人
骨其下是為慈溪犇流與江會予自吳入楚行五千
餘里過十五州亭榭之勝無如白雲者而止在縣廨
聽事之後已東了無一事為令者可以寢飯於亭中

其樂無涯而闕令動輒二三年無肯補者何哉

二十二日發巴東山益奇怪有夫子洞者一竇在峭壁絕高處人迹所不可至然髣髴若有欄楯不知所謂夫子者何也過三分泉自山竇中出止兩派俗云三派有年兩派中熟一派或絕流饑饉洎疲石夜雨

二十三日過巫山凝真觀謁妙用真人祠真人即世所謂巫山神女也祠正對巫山峰巒上入霄漢山腳直插江中議者謂太華衡廬皆無此奇然十二峯者不

可悉見所見八九峯惟神女峯最為纖麗奇峭宜為
仙真所託祝史云每八月十五夜月明時有絲竹之
音往來峰頂山猿皆鳴達旦方漸止廟後山半有石
壇平曠傳云夏禹見神女授符書於此壇上觀十二
峯宛如屏障是日天宇晴霽四顧無纖翳惟神女峰
上有白雲數片如鸞鶴翔舞裴徊久之不散亦可異
也祠舊有鳥數百送迎客舟自唐袁州刺史李貽詩
已云羣鳥幸昨餘矣近乾道元年忽不至今絕無一

烏不知其故泊清水洞洞極深後門自山後出但點
闇水流其中鮮能入者歲旱祈雨頗應權知巫山縣
左文林郎冉徽之尉右廸功郎文庶幾來

二十四日早抵巫山縣在峽中亦壯縣也市井勝歸峽
二郡隔江南陵山極高大有路如綫盤屈至絕頂謂
之一百八盤蓋施州正路黃魯直詩云一百八盤攜
手上至今歸夢繞羊腸即謂此也縣廨有故鐵盆底
銳似半甕狀極堅厚銘在其中蓋漢永平中物也缺

處鐵色光黑如佳漆字畫淳質可愛玩有石刻魯直
作盆記大略言建中靖國元年予弟叔向嗣直自涪
陵尉攝縣事予起戎州來寓縣廨此盆舊以種蓮余
洗滌乃見字云遊楚故離宮俗謂之細腰宮有一池
亦當時宮中燕遊之地今湮沒略盡矣三面皆荒山
南望江山奇麗又有將軍墓東晉人也一碑在墓後
跌陷入地碑傾前欲壓字纔半存

二十五日晡後至大谿口泊舟出美梨大如升

二十六日發大谿口入瞿唐峽兩壁對聳上入霄漢其
平如削成仰視天如足練然水已落峽中平如油蓋
過聖姥泉蓋石上一罇人大呼於旁則泉出屢呼則
屢出可怪也晚至瞿唐關唐故夔州與白帝城相連
杜詩云白帝夔州各異城蓋言難辨也關西門正對
灩澦堆堆碎石積成出水數十丈土人云方夏秋水
漲時水又高於堆數十丈肩輿入關謁白帝廟氣象
甚古松栢皆數百年物有數碑皆孟蜀時所立庭中

石筍有黃魯直建中靖國元年題字又有越公堂隋楊素所創少陵為賦詩者已毀今堂近歲所築亦甚宏壯自關而東即東屯少陵故居也

二十七日早至夔州州在山麓沙上所謂魚復永安宮也宮今為州倉而州治在宮西北甘夫人墓西南景德中轉運使丁謂薛顏所徙比白帝頗平曠然失關險無復形勢在瀼之西故一曰瀼西土人謂山間之流通江者曰瀼云州東南有八陣磧孔明之遺迹碎

石行列如引繩每歲江漲磧上水數十丈比退陣石
如故

渭南文集卷四十八

欽定四庫全書

渭南文集卷四十九

宋 陸游 撰

赤壁詞

招韓無咎
遊金山

禁門鐘曉憶君來
朝路初翔鸞鵠西
府中臺推獨步行
對金蓮宮燭感繡
華鞵僊葩寶帶看
即飛騰速人生難
料一尊此地相屬
回首紫陌青門西
湖閒院鎖千梢
脩竹素壁棲鴉應
好在殘夢不堪重
續歲月驚心功名

看鏡短鬢無多綠一歡休惜與君同醉浮玉

浣沙溪

和無咎韻

嬾向沙頭醉玉瓶喚君同賞小窓明夕陽吹角最關情
忙日苦多閒日少新愁常續舊愁生客中無伴怕君
行

又

南鄭席上

浴罷華清第二湯紅綿撲粉玉肌涼娉婷初試藕絲裳
鳳尺裁成猩血色螭奩熏透麝臍香水亭幽處捧霞

觴

青玉案

與朱景參
會北嶺

西風挾雨聲翻浪
恰洗盡黃茆瘴
老慣人間齊得喪
千巖高卧五湖歸棹
替却凌煙像

故人小駐平戎帳
白羽腰間氣何壯
我老漁樵君將相
小槽紅酒晚香丹荔
記取蠻江上

水調歌頭

多景樓

江左占形勝
最數古徐州
連山如畫
佳處縹渺著危樓

鼓角臨風悲壯烽火連空明滅往事憶孫劉千里曜戈
甲萬竈宿貔貅露霑草風落木歲方秋使君宏放談
笑洗盡古今愁不見襄陽登覽磨滅遊人無數遺恨黯
難收叔子獨千載名與漢江流

浪淘沙

丹陽浮玉
亭席上作

綠樹暗長亭幾把離尊陽關常恨不堪聞何況今朝秋
色裏身是行人清淚浥羅巾各自消魂一江離恨恰
平分安得千尋橫鐵鎖截斷煙津

定風波

進賢道上見
梅贈王伯壽

歌帽垂鞭送客回小橋流水一枝梅
衰病逢春都不記誰謂幽香却解逐人來
安得身閒頻置酒攜手與君看到十分開
少壯相從今雪鬢因甚流年羈恨兩相催

南鄉子

歸夢寄吳檣水驛江程去路長
想見芳洲初繫纜斜陽煙樹參差認武昌
愁鬢點新霜曾是朝衣染御香
重到故鄉交舊少淒涼却恐它鄉勝故鄉

又

早歲入皇州，樽酒相逢盡勝流。
三十年來真一夢，堪愁。
客路蕭蕭兩鬢秋。
蓬嶠偶重遊，不待人嘲我自羞。
看鏡倚樓俱已矣，扁舟月笛煙蓑萬事休。

滿江紅

危堞朱欄，登覽處、一江秋色。
人正似、征鴻社燕，幾番輕別。
繾綣難忘當日語，淒涼又作它鄉客。
問鬢邊、都有幾多絲，真堪織。
楊柳院秋千陌，無限事成虛擲。
如今何

處也夢魂難覓金鴨微溫香縹緲錦茵初展情蕭瑟料
也應紅淚伴秋霖燈前滴

又

夔州催王伯禮
侍御尋梅之集

疎蕊幽香禁不過晚寒愁絕那更是巴東江上楚山千
疊歌帽閒尋西瀼路驪鞭笑向南枝說恐使君歸去上
鑾坡孤風月清鏡裏悲華髮山驛外溪橋側悽然回
首處鳳凰城闕顚顚如今誰領略飄零已是無顏色問
行厨何日喚賓僚猶堪打

感皇恩

伯禮立春
生日

春色到人間
綵幡初戴正好春盤
細生菜一般日月只
有仙家偏耐雪霜從點鬢朱顏在
溫詔鼎來延英催
對鳳閣鸞臺看除拜
對衣裁穩恰稱毬紋新帶箇時方
旋了功名債

又

小閣倚秋空
下臨江渚漠漠孤雲未成雨
數聲新雁回首杜陵何處
壯心空萬里人誰許
黃閣紫樞禁壇開

府莫怕功名欠人做
如今熟計只有故鄉歸路
石帆山脚下菱三畝

好事近

寄張真甫

羈雁未成歸腸斷寶箏零落那更凍醪無力似故人情
薄瘴雲蠻雨暗孤城身在楚山角煩問劔南消息怕
還成疎索

又

風露九霄寒侍宴玉華宮闕親向紫皇香案見金芝千

葉 碧壺仙露醞初成香味兩奇絕醉後却騎丹鳳看
蓬萊春色

又

次字文
卷目韻

客路苦思歸愁似蠶絲千緒夢裏鏡湖煙雨看山無重
數 尊前消盡少年狂慵著送春語花落燕飛庭戶數
年光如許

又

歲晚喜東歸掃盡市朝陳迹揀得亂山環處釣一潭澄

碧 賣魚沽酒醉還醒
心事付橫笛家在萬重雲外有
沙鷗相識

又

華表又千年誰記駕雲孤
鶴回首舊曾遊處但山川城
郭紛紛車馬滿人間塵土汙
芒屨旦訪葛仙丹井看
巖花開落

又

揮袖別人間飛躡峭崖蒼壁
尋見古仙丹竈有白雲成

積心如潭水靜無風一坐數千息夜半忽驚奇事看
鯨波暎日

又

湓口放船歸薄暮散花洲宿兩岸白蘋紅蓼映一蓑新
綠有沽酒處便為家菱芡四時足明日又乘風去任

江南江北

又登梅仙山
絕頂望海

揮袖上西峰孤絕去天無尺拄杖下臨鯨海數煙颿歷

歷貪看雲氣舞青鸞歸路已將夕多識半山松吹解
慙慙留客

又

小倦帶餘酲澹澹數櫺斜日驅退睡魔十萬有雙龍蒼
壁少年算笑老人衰風味似平昔扶杖凍雲深處探
溪梅消息

又

覓箇有緣人分付玉壺靈藥誰向市塵深處識遼天孤

鶴 月中吹笛下巴陵
條華赴前約今古廢興何限歎
山川如昨

又

平旦出秦關雪色駕車雙
鹿借問此行安往賞清伊脩
竹 漢家宮殿劫灰中
春草幾回綠君看變遷如許況
紛紛榮辱

又

秋曉上蓮峯高躡倚天青壁
誰與放翁為伴有天壇輕

策鏗鏗然忽變赤龍飛雷雨四山黑談笑做成豐歲笑
禪龕柳栗

鷓鴣天

送葉夢錫

家住東吳近帝鄉平生豪舉少年場十千沽酒青樓上
百萬呼盧錦瑟傍身易老恨難忘尊前贏得是淒涼
君歸為報京華舊一事無成兩鬢霜

又

葭萌驛作

看盡巴山看蜀山子規江上過春殘慣眠古驛常安枕

熟聽陽關不慘顏 慵眠氣嬾燒丹不妨青鬢戲人間
祕傳一字神仙訣說與君知只是頑

又

梳髮金盤剩一窩 画眉鸞鏡暈雙蛾 人間何處無春到
只有伊家獨占多 微步處奈嬌何 春衫初換麝塵羅
東鄰聞草歸來晚 忘却新傳子夜歌

又

家住蒼煙落照間 絲毫塵事不相關 斟殘玉瀝行穿竹

卷罷黃庭卧看山 貪嘯傲任衰殘不妨隨處一開顏
元知造物心腸別老却英雄似等閒

又

插脚紅塵已是顛更求平地上青天新來有箇生涯別
買斷煙波不用錢 沽酒市採菱船醉聽風雨擁蓑眠
三山老子真堪笑見事遲來四十年

又

嬾向青門學種瓜只將漁釣送年華
雙雙新燕飛春岸

片片輕鷗落晚沙
歌縹緲艣嘔啞酒如清露鮮如花
逢人問道歸何處笑指船兒此是家

又薛公肅家
席上作

南浦舟中兩玉人誰知重見楚江濱
憑教後苑紅牙版引上西川綠錦茵
纔淺笑却輕嚔淡黃楊柳又催春
情知言語難傳恨不似琵琶道得真

驀山溪
送伯禮

元戎十乘出次高唐館
歸去舊鴉行更何人齊飛霄漢

瞿唐水落惟是淚波深催疊鼓起牙檣難鎖長江斷
春深鰲禁紅日宮帟暖何處望音塵黯消魂層城飛觀
人情見慣不敢恨相忘梅驛外夢灘邊只待除書看

又遊三崇
龍洞

窮山孤壘臘盡春初破寂寞掩空齋好一箇無聊底我
嘯臺龍岫隨分有雲山臨淺瀨蔭長松閒據胡床坐

二盃徑醉不覺紗巾墮畫角喚人歸落梅村籃輿夜過
城門漸近幾點妓衣紅官驛外酒壚前也有閒燈火

木蘭花

立春
日作

三年流落已山道破盡青衫塵滿帽身如西瀛渡頭雲
愁抵瞿唐關上草春盤春酒年年好試戴銀幡判醉
倒今朝一歲大家添不是人間偏我老

朝中措

梅

幽姿不入少年場無語只淒涼一箇飄零身世十分冷
淡心腸江頭月底新詩舊夢孤恨清香任是春風不
管也曾先識東皇

又代譚得
稱作

怕歌愁舞嬾逢迎
粧晚託春醒
總是向人深處當時枉
道無情
關心近日啼紅密訴
剪綠深盟
杏館花陰恨
淺画堂銀燭嫌明

又

蓼蓼雛鼓餞流年
燭焰動金船
綵燕難尋前夢酥花空
點春妍
文園謝病蘭成久
旅回首淒然
明月梅山笛
夜和風禹廟鷺天

臨江仙

離果
州作

鳩雨催成新綠，燕泥收盡殘紅。春光還與美人同。論心
空眷眷，分袂却匆匆。只道真情易寫，那知怨句難工。
水流雲散各西東。半廊花院月，一帽柳橋風。

蝶戀花

離小
益作

陌上簫聲寒食近，雨過園林，花氣浮芳潤。千里斜陽鍾
欲暝，憑高望斷南樓信。海角天涯行略盡，三十年間，
無處無遺恨。天若有情終欲問，忍教霜點相思鬢。

又

桐葉晨飄蛩夜語旅思秋光黯黯長安路忽記橫戈盤
馬處散關清渭應如故江海輕舟今已具一卷兵書
歎息無人付早信此生終不遇當年悔草長楊賦

又

水漾萍根風卷絮倩笑嬌嬾忍記逢迎處只有夢魂能
再遇堪嗟夢不由人做夢若由人何處去短帽輕衫
夜夜眉州路不怕銀缸深繡戶只愁風斷青衣渡

釵頭鳳

紅酥手黃滕酒滿城春色宮牆柳東風惡歡情薄一懷
愁緒幾年離索錯錯錯春如舊人空瘦淚痕紅浥蛟
綃透桃花落閑池閣山盟雖在錦書難託莫莫莫

清商怨

葭萌驛作

江頭日莫痛飲乍雪晴猶凜山驛淒涼燈昏人獨寢
鴛機新寄斷錦歎往事不堪重省夢欲南樓綠雲堆一
枕

水龍吟

榮甫作

樽前花底尋春處堪歎心情全減一身萍寄酒徒雲散
佳人天遠那更今年瘴煙蠻雨夜郎江畔漫倚樓橫笛
臨窓看鏡時揮涕驚流轉花落月明庭院悄無言魂
消腸斷憑肩攜手當時曾效畫梁栖燕見說新來綢繆
塵暗舞衫歌扇料也羞顛顚慵行芳徑怕啼鶯見

秋波媚

七月十六日晚登高
興亭望長安南山

秋到邊城角聲哀烽火照高臺悲歌擊筑憑高酹酒此

興悠哉 多情誰似南山月
特地莫雲開 灞橋煙柳曲
江池館應待人來

又

曾散天花蕊珠宮 一念墮塵中
鉛華洗盡珠璣不御道
骨仙風 東遊我醉騎鯨去
君駕素鸞從 垂虹看月天
台采藥更與誰同

采桑子

寶釵樓上粧梳晚 嬾上鞦韆
閑撥沉湮金縷衣寬睡髻

偏鱗鴻不寄遼東信又是經年彈淚花前愁入春風

十四絃

卜算子

詠梅

驛外斷橋邊寂寞開無主已是黃昏獨自愁更著風和
雨無意苦爭春一任羣芳妬零落成泥碾作塵只有
香如故

沁園春

三榮橫谿
閣小宴

粉破梅梢綠動萱叢春意已深漸珠簾低卷筇枝微步

冰開躍鯉林暖鳴禽荔子扶疎竹枝哀怨濁酒一尊和
淚斟憑欄久歎山川冉冉歲月駸駸當時豈料如今
漫一事無成霜鬢侵看故人強半沙堤黃閣魚懸帶玉
貂映蟬金許國雖堅朝天無路萬里淒涼誰寄音東風
裏有灞橋煙柳知我歸心

又

一別秦樓轉眼新春又近放燈憶盈盈倩笑纖纖柔握
玉香花語雪暖酥凝念遠愁腸傷春病思自怪平生殊

未會君知否，漸香消、蜀錦波瀾。吳綾難求繫日，長繩
況倦客飄零，少舊朋。但江郊雁起，漁村笛怨，寒缺委爐
孤硯生冰。水繞山圍，煙昏雲慘，縱有高臺常怯登消魂
處，是魚鱗不到，蘭夢無憑。

又

孤鶴歸飛，再過遼天，換盡舊人。念累累枯塚，茫茫夢境，
王侯螻螻，畢竟成塵。載酒園林，尋花巷陌，當日何曾輕
負春。流年改歎，圍腰帶，剗點鬢霜新。交親散落如雲。

又豈料如今餘此身幸眼明身健茶甘飯軟非惟我老
更有人負艱盡危機消殘壯志短艇湖中閑采蓴吾何
恨有漁翁共醉谿友為隣

憶秦娥

玉花驄晚街金轡聲
玳瓏聲玳瓏閑歌烏帽又過城東
富春巷陌花重重
千金沽酒酬春風
酬春風
笙歌圍裏錦繡鼓中

漢宮春

張園賞海棠作園
故蜀燕王宮也

浪迹人間喜聞猿楚峽學劒秦川虛舟汎然不繫萬里
江天朱顏綠鬢作紅塵無事神仙何妨在鶯花海裏行
歌閑送流年 休笑放慵狂眼看閑坊深院多少嬋娟
燕宮海棠夜宴花覆金船如椽画燭酒闌時百炬吹煙
憑寄語京華舊侶幅巾莫換貂蟬

又
來成都作

羽箭雕弓憶呼鷹古壘截虎平川吹笳莫歸楚帳雪壓
青氊淋漓醉墨看龍蛇飛落蠻箋人誤許詩情將略一

時才氣超然 何事又作南來看重陽藥市元夕燈山
花時萬人樂處歌帽垂鞭聞歌感舊尚時時流涕尊前
君記取封侯事在功名不信由天

月上海棠

成都城南有蜀王舊苑
多梅皆二百餘年古木

斜陽廢苑朱門閉 吊興亡遺恨淚痕裏淡淡宮梅也依
然點酥剪水凝愁處似憶宣華舊事 行人別有淒涼

意折幽香誰與寄千里佇立江皋杳難逢隴頭歸騎音

塵遠楚天危樓獨倚

宣華故
蜀苑名

又

蘭房繡戶厭厭病歎春醒中悶甚時醒燕子空歸幾曾
傳玉闌邊信傷心處獨展團窠瑞錦熏籠消歇沈煙
冷淚痕深展轉看花影漫擁餘香怎禁他峭寒孤枕西
窓曉幾聲銀瓶玉井

烏夜啼

金鴨餘香尚煖綠窓斜日偏明蘭膏香染雲鬟膩釵墜
滑無聲冷落鞦韆伴侶闌珊打馬心情繡屏驚斷滿

湘夢花外一聲鶯

又

簷角楠陰轉日樓前荔子吹花鷓鴣聲裏霜天晚疊鼓
已催衙鄉夢時來枕上京書不到天涯邦人訟少文
移省閑院自煎茶

又

我按丹臺玉字君書蓋殿雲篇錦官城裏重相遇心事
兩依然攜酒何妨處處尋梅共約年年細思上界多

官府且作地行仙

又

世事從來慣見吾生更欲何之鏡湖西畔秋千頃鷗鷺
共忘機一枕蘋風午醉二升菰米晨炊故人莫訝音
書絕釣侶是新知

又

素意幽棲物外塵綠浪走天涯歸來猶幸身強健隨分
作山家已趁餘寒泥酒還乘小雨移花柴門盡日無

人到一徑傍谿斜

又

園館青林翠樾衣巾細葛輕紉好風吹散霏微雨沙路
喜新乾小燕雙飛水際流鶯百轉林端投壺聲斷彈
碁罷閒展道書看

又

從宦元知漫浪還家更覺清真蘭亭道上多脩竹隨處
岸綸巾泉冽偏宜雪茗杭香雅稱絲蓴脩然一飽西

窓下天地有閒人

又

紈扇嬋娟素月紗巾縹渺輕煙高槐葉長陰初合清潤
雨餘天 弄筆斜行小草鈎簾淺醉閒眠更無一點塵
埃到枕上聽新蟬

真珠簾

山村水館參差路感羈遊正似殘春風絮掠地穿簾知
是竟歸何處鏡裏新霜空自憫問幾時鶯臺顰暑遲莫

謨憑高懷遠書空獨語 自古儒冠多誤悔當年早不
扁舟歸去醉下白蘋洲看夕陽鷗鷺菰菜鱸魚都棄了
只換得青衫塵土休顧早收身江上一蓑煙雨

好事近

混迹寄人間夜夜画樓銀燭誰見五雲丹竈養黃芽初
熟 春風歸從紫皇遊東海宴賜谷進罷碧桃花賦賜
玉塵千斛

渭南文集卷四十九

欽定四庫全書

渭南文集卷五十

宋陸游撰

柳梢青

故蜀燕王宮海棠之盛
為成都第一今屬張氏

錦里繁華環宮故邸
疊萼奇花俊客妖姬
爭飛金勒
駐香車
何須幙障
帷遮
寶盃浸紅雲
瑞霞銀燭光中
清歌聲裏
休恨天涯

又

乙巳二月
西興贈別

十載江湖行歌沽酒不到京華底事翩然長亭煙草裊
鬢風沙憑高目斷天涯細雨外樓臺萬家只恐明朝
一時不見人共梅花

夜遊宮

記夢寄
師伯渾

雪曉清笳亂起夢遊處不知何地鐵騎無聲望似水想
闕河雁門西青海陰睡覺寒燈裏漏聲斷月斜窓紙
自許封侯在萬里有誰知鬢雖殘心未死

又
詞宮

獨夜寒侵翠被奈幽夢不成還起欲寫新愁淚濺紙憶
承恩數餘生今至此 蕕蕕燈花墜問此際報人何事
只尺長門過萬里恨君心似危欄難久倚

安公子

風雨初經社子規聲裏春光謝最是無情零落盡薔薇
一架況我今年顛顚幽窓下人盡怪詩酒消聲價向藥
爐經卷忘却鶯窓柳榭 萬事収心也粉痕猶在香羅
帕恨月愁花爭信道如今都罷空憶前身便面章臺馬

因自來禁得心腸怕縱遇歌逢酒但說京都舊話

玉蝴蝶

王忠州家
席上作

倦客平生行處墜鞭京洛解佩瀟湘此夕何年來賦宋
玉高唐繡簾開香塵乍起蓮步穩銀燭分行暗端相燕
羞鶯妬蝶擾蜂忙難忘芳樽頻勸峭寒新退玉漏猶
長幾許幽情只愁歌罷月侵廊欲歸時司空笑問微近
處丞相嗔狂斷人腸假饒相送上馬何妨

木蘭花慢

夜登青城
山玉華樓

閒邯鄲夢境歎綠鬢早霜侵奈華岳燒丹青
看鶴尚負初心年來向濁世裏悟真詮祕訣
絕幽深養就金芝九畹種成琪樹千林星壇
夜學步虛吟露冷透瑤簪對翠鳳披雲青鸞
遡月宮闕蕭森琅函一封奏罷自鈞天帝所
有知音却過蓬壺嘯傲世間歲月駸駸

蘇武慢

唐西
安湖

澹靄空濛輕陰清潤綺陌細塵初靜平橋繫
馬畫閣移舟湖水倒空如鏡掠岸飛花傍簷
新燕都似學人無定

歎連年戎帳經春邊壘暗凋顏鬢空記憶杜曲池臺
新豐歌管怎得故人音信羈懷易感老伴無多談塵久
閑犀柄惟有翛然筆床茶竈自適筍輿煙艇待綠荷遮
岸紅蕖浮水更森幽興

齊天樂

左綿
道中

角殘鐘晚關山路行人乍依孤店塞月征塵鞭絲帽影
常把流年虛占藏鴉柳暗歎輕負鶯花謾勞書劍事往
闕情悄然頻動壯遊念孤懷誰與強遣市壚沽酒酒

薄怎當愁釀倚瑟妍詞調鉛妙筆那寫柔情芳豔征途
自厭况煙斂蕪痕雨稀萍點最是眠時枕寒門半掩

又 三榮人日
遊龍洞作

客中隨處閑消悶來尋嘯臺龍岫路斂春泥山開翠霧
行樂年年依舊天工妙手放輕綠萱牙淡黃楊柳笑問
東君為人能染鬢絲否 西州催去近也帽簷風軟且
看市樓沽酒宛轉巴歌淒涼塞管攜客何妨頻奏征塵
暗袖漫禁得梅花伴人疎瘦幾日東歸畫船平放溜

望梅

壽非金石恨天教老向水程山驛似夢裏來到南柯這
些子先陰更堪輕擲戍火邊塵又過了一年春色歎名
姬駿馬盡付杜陵苑路豪客長繩漫道繫日看人間
俛仰俱是陳迹縱自倚英氣凌雲奈回盡鵬程鍛殘鶯
翻終日憑高悄不見江東消息算沙邊也有斷鴻倩誰
問得

洞庭春色

壯歲文章莫年勲業自昔誤人算英雄成敗軒裳得失
難如人意空喪天真請看邯鄲當日夢待收罷黃梁徐
欠伸方知道許多時富貴何處闌身 人間定無可意
怎換得玉鱠絲蓴且釣竿漁艇筆牀茶竈閑聽荷雨一
洗衣塵洛水秦關千古後尚棘暗銅駝空愴神何須更
慕封侯定遠圖像麒麟

漁家傲

寄仲高

東望山陰何處是往來一萬三千里寫得家書空滿紙

流清淚書回已是明年事
寄語紅橋橋下水扁舟何
日尋兄弟行徧天涯真老矣愁無寐
鬢絲幾縷茶煙裏

繡停針

歎半紀跨萬里秦吳頓覺哀謝回首
鴈行英俊並遊只尺玉堂金馬氣凌
嵩華負壯略縱橫王霸夢經洛浦梁
園覺來淚流如瀉山林定去也却自
恐說著少年時話靜院焚香閑倚素
屏今古總成虛假起時婚嫁幸自有
湖邊茅舍燕歸應笑客中又還過社

桃園憶故人

并序

三榮麗治之西因子城作樓觀曰高坐下臨山村蕭然如世外余留七十日被命參成都戎幙而去臨行徙倚竟日作桃源憶故人一首

斜陽寂歷柴門閉一點炊煙時起雞犬往來林外俱有蕭然意
哀翁老去疎榮利絕愛山城無事臨去画樓頻倚何日重來此

又

應靈道中

欄干幾曲高齋路正在重雲深處丹碧未乾人去高棟
空留句 離離芳草長亭莫無奈征車不住惟有斷鴻
煙渚知我頻回顧

又

一彈指頃浮生過墮甌元知當破去去醉吟高卧獨唱
何須和 殘年還我從來我萬里江湖煙舸脫盡利名
韞鐔世界元來大

又

城南載酒行歌路
冶葉倡條無數一
朶鞵紅凝露最是
關心處
鶯聲無賴催春去
那更兼旬風雨試
問歲華何許芳草
連天莫

又題華
山圖

中原當日三川震
關輔回頭煨燼淚
盡兩河征鎮日望
中興運
秋風霜滿青青鬢
老却新豐英俊雲
外華山千仞依舊
無人問

極相思

江頭疎雨輕煙寒食落花天翻紅墜素殘霞暗錦一段
淒然惆悵東君堪恨處也不念冷落樽前那堪更看
空相起柳絮榆錢

一叢花

樽前凝佇漫魂迷猶恨負幽期從來不慣傷春淚為伊
後滴滿羅衣那堪更是吹簫池館青子綠陰時回廊
簾影畫參差偏共睡相宜朝雲夢斷知何處倩歸燕說
與相思從今判了十分顚願圖要箇人知

又

仙妹天上自無雙
玉同翠蛾長黃庭讀罷心如水
閑朱戶愁近絲簧
窈明几淨閑臨唐帖
深炷寶奩香
人間無藥駐流光
風雨又催涼
相逢共話清都舊
歎塵劫生死茫茫
何如伴我綠蓑青箬
秋晚釣瀟湘

隔浦蓮近拍

飛花如趁燕子直度簾櫳裏
帳掩香雲暖金籠鸚鵡驚
起凝恨慵梳洗
粧臺畔蘸粉纖纖指
寶釵墜才醒又

困厭厭中酒滋味墻頭柳暗過盡一年春事
畫高樓怕獨倚千里孤舟何處煙水

又

騎鯨雲路倒景醉面風吹醒笑把浮丘袂
寥然非復塵境震澤秋萬頃煙霏散水面
飛金鏡露華冷相妃睡起鬟傾釵墜
慵整臨江舞處零亂塞鴻清影河漢橫斜
夜漏永人靜吹簫同過緱嶺

昭君怨

畫永蟬聲庭院人倦嬾搖團扇小景瀉瀟湘自生涼
簾外蹴花雙燕簾下有人同見寶篆折宮黃炷熏香

雙頭蓮

呈范至能待制

華鬢星星驚壯志成虛此身如寄蕭條病驥向暗裏消
盡當年豪成夢斷故國山川隔重重煙水身萬里舊社
凋零青門俊遊誰記盡道錦里繁華歎官閑畫永柴
荆添睡清愁自醉念此際付與何人心事縱有楚施吳
橋知何時東逝空悵望鱸美菰香秋風又起

南歌子

送周機宜
之益昌

異縣相逢晚 中年作別難
算秋風雨客衣寒 又向朝
天門外話悲歡 瘦馬行
霜棧輕舟下雪灘 烏奴
山下 一林丹為說三年
常寄夢魂間

豆葉黃

春風樓上柳腰肢 初試花
前金縷衣 娟娟娉娉不自持
曉粧遲畫得蛾眉勝舊時

又

一春常是雨和風
風雨晴時春已空
誰惜泥沙萬點紅
恨難窮
恰似哀翁一世中

醉落魄

江湖醉客投盃起舞
遺鳥憤三更冷
翠霑衣溼娟娟菱
歌催落半川月
空花昨夢休尋覓
雲臺麟閣俱陳迹
元來只有閑難得
青史功名天却無心惜

鵲橋仙

華燈縱博雕鞍馳射
誰記當年豪舉
酒徒一一取封侯

獨去作江邊漁父 輕舟八尺低篷三扇占斷蘋洲煙
雨鏡湖元自屬閑人又何必君恩賜與

又

一竿風月一蓑煙雨家在釣臺西住賣魚生怕近城門
況肯到紅塵深處潮生理權潮平繫纜潮落浩歌歸
去時人錯把比嚴光我自是無名漁父

又

夜聞
杜鵑

茆簷人靜蓬窓燈暗春晚連江風雨林鶯巢燕總無聲

但月夜常啼杜宇 催成清淚驚殘孤夢又揀深枝飛
去故山猶自不堪聽況半世飄然羈旅

長相思

雲千重水千重身在千重雲水中月明收釣筒 頭未
童耳未聾得酒猶能雙臉紅一尊誰與同

又

橋如虹水如空一葉飄然煙雨中天教稱放翁 側船
篷使江風蟹舍參差漁市東到時聞暮鐘

又

面蒼然鬢皤然滿腹詩書不直錢官閑常晝眠
画凌煙上甘泉自古功名屬少年知心惟杜鵑

又

算山青算霞明夢筆橋頭艇子橫蘋風吹酒醒
看潮生看潮平小住西陵莫較程萼絲初可烹

又

悟浮生厭浮名回視千鍾一髮輕從今心太平
愛松

聲愛泉聲寫向孤桐誰解聽空江秋月明

菩薩蠻

江天淡碧雲如掃蘋花零落蓴絲老細細晚波平月從
波面生漁家真箇好悔不歸來早經歲洛陽城鬢絲
添幾莖

又

小院蠶眠春欲老新巢燕泥花如掃幽夢錦成西海棠
如舊時當年真草草一櫂還吳早題罷惜春詩鏡中

添鬢絲

訴衷情

當年萬里覓封侯，
疋馬戍梁州。
關河夢斷，
何處塵暗舊貂裘。
胡未滅，
鬢先秋。
淚空流。
此生誰料，
心在天山，
身老滄洲。

老滄洲

又

青衫初入九重城，
結友盡豪英。
蠟封夜半，
傳檄馳騎諭幽并。
時易失，
志難成。
鬢絲生。
平章風月，
彈壓江山，
別

是功名

生查子

還山荷主恩。聊試扶犁手。
新結小茆茨。恰占清江口。
風塵不化衣。鄰曲常持酒。
那似宦遊時。折盡長亭柳。

又

梁空燕委巢。院靜鳩催雨。
香潤上朝衣。客少開談麈。
鬢邊千縷絲。不足吳蠶吐。
孤夢泛瀟湘。月落聞柔櫓。

破陣子

仕至千鍾良易年過七十常稀眼底榮華元是夢身後
聲名不自知營營端為誰幸有旗亭沽酒何妨繭紙
題詩幽谷雲蘿朝採藥靜院軒窓夕對碁不歸真箇癡

又

看破空花塵世放輕昨夢浮名蠟屐登山真率飲筇杖
穿林自在行身閑心太平料峭餘寒猶力廉纖細雨
初晴苔紙閑題谿上句菱唱遙聞煙外聲與君同醉醒

上西樓

一名相見歡

江頭綠暗紅稀燕交飛忽到當年行處恨依依
灑清淚歎人事與心違滿酌玉壺花露送春歸

點絳脣

采藥歸來獨尋茆店沽新釀算煙千嶂處處聞漁唱
醉弄扁舟不怕黏天浪江湖上遮回疎放作箇閑人樣

謝池春

壯歲從戎曾是氣吞殘虜陣雲高狼烽夜舉朱顏青鬢
擁雕戈西戎笑儒冠自來多誤功名夢斷却泛扁舟

吳楚漫悲歌傷懷弔古煙波無際望秦闕何處歎流年
又成虛度

又

賀監湖邊初繫放翁歸棹小園林時時醉倒春眠驚起
聽啼鶯催曉歎功名誤人堪笑朱橋翠徑不許京塵
飛到挂朝衣東歸久早連宵風雨捲殘紅如掃恨樽前
送春人老

又

七十衰翁不減少年豪氣似天山淒涼病驥銅駝荆棘
灑臨風清淚甚情懷伴人兒戲如今何幸作箇故谿
歸計鶴飛來晴嵐暝翠玉壺春酒約羣僊同醉洞天寒
露桃開未

一落索

滿路遊絲飛絮韶光將暮此時誰與說新愁有百轉流
鶯語頻仰人間今古神仙何處花前須判醉扶歸酒
不到劉伶墓

又

識破浮生虛妄從人譏謗此身恰是弄潮兒曾過了千
重浪 且喜歸來無恙一壺春釀雨蓑煙笠傍漁磯應
不是封侯相

杏花天

老來駒隙駸駸度算只合狂歌醉舞金盃到手君休訴
看著春光又算誰為倩柳條繫住且莫遣城笳催去
殘紅轉眼無尋處盡屬峰房燕戶

太平時

竹裏房櫳一徑深
靜悄悄亂紅飛盡綠成陰
有鳴禽
臨罷蘭亭無一事
自修琴
銅爐裊裊海南沈
沈塵襟

戀繡衾

不惜貂裘換釣蓬
嗟時人誰識放翁歸
櫂借樵風穩數
聲聞林外算鐘
幽棲莫笑蝸廬小
有雲山煙水萬重
半世向丹青看喜
如今身在畫中

又

無方能駐臉上紅笑浮生擾擾夢中平地是冲霄路又
何勞千日用功飄然再過蓮峯下亂雲深吹下算鐘
訪舊隱依然在但鶴巢時有墮松

風入松

十年裘馬錦江濱酒隱紅塵萬金選勝鶯花海倚疎狂
驅使青春吹笛魚龍盡出題詩風月俱新自憐華髮
滿紗巾猶是官身鳳樓常記當年語問浮名何似身親
欲寄吳牋說與這回真箇閑人

真珠簾

燈前月下嬉遊處向笙歌錦繡叢中相遇彼此知名纔
見便論心素淺黛嬌蟬風調別最動人時時偷顧歸去
想閑牕深院調絃促柱 樂府初翻新譜漫裁紅點翠
閑題金縷燕子入簾時又一番春草側帽燕脂坡下過
料也記前年崔護休訴待從今須與好花為主

風流子

一名內家嬌

佳人多命薄初心慕德耀嫁梁鴻記綠窗睡起靜吟閑

詠句翻離合格變玲瓏更乘興素紈留戲墨纖玉撫孤
桐蟾滴夜寒水浮微凍鳳牋春麗花研輕紅 人生誰
能料堪悲處身落柳陌花叢空羨畫堂鸚鵡深閉金籠
向寶鏡鸞釵臨粧常晚繡茵牙版催舞還慵腸斷市橋
月笛燈院霜鐘

雙頭蓮

風卷征塵堪歎處青驄正搖金轡客襟貯淚漫萬點如
血憑誰持寄佇想艷態幽情壓江南佳麗春正媚怎忍

長亭匆匆頻分連理 目斷淡日平蕪煙濃樹遠微茫
如薺悲歡夢裏奈倦客又是關河千里最苦唱徹驪歌
重遲留無計何限事待與丁寧行時已醉

鷓鴣天

杖屨尋春苦未遲洛城櫻筍正當時三千里外歸初到
五百年前事總知 吹玉笛渡清伊相逢休問姓名誰
小車處士深衣叟曾是天津共賦詩

蝶戀花

禹廟蘭亭今古路一夜清霜染盡湖邊樹鸚鵡杯深君
莫訴他時相遇知何處冉冉年華留不住鏡裏朱顏
畢竟消磨去一句丁寧君記取神仙須是閑人做



渭南文集卷五十